

## **Su late e su casu**

### **Trastos e istrezos**

**Su moju:** chi fuat de lama

**Sas brocas:** 10,15,21,25 litros

**Su coladore, truddas, pannos e cuneddos, cannitzos e cannitzadas**

### **Murghidura**

In antis sa mandra fuat tunda, a pustis ant fatu sa mandra longa.

Si murghiat a caddu; calincunu murghiat a costaos (s'in prus po sas crabas) puite andaiat male a dd'imperriare ca sa craba est cadduda e ca est prus pagu maseda.

Si murghiat duas bortas a sa die: a manzanu e a sero dae cando sos anzones fuant argasaos fintzas a Santu Juanni (24 de làmpadas, ma dipendiat dae s'annada). Si s'erbeghe zughiat ancora late, a pustis chi s'anzone aiat sutu si podiat mürghere su late abbarrau.

S'in prus in istadiale, si murghiat in antis una borta a sa die e a posca una die eja e una nono.

Chimbe meses in antis de anzare s'erbeghe non si murghiat prus.

A pustis murtu su late si podiat lassare in su cuile o sas brocas ddas carrigaiant cun su molente po nche ddas leare a bidda.

### **Su casu**

Su casu si podiat fàere siat in cuile che in domo.

Si faiat su fogu, si poniat su labiolu in pitzu e si faiat callentare su late. In antis su gradu de callentadura zusta de su late si mediat cun sas manos. Cando fuat callentau, si poniat su cazu "sa lana de cazu" chi fuat de istògomo de crabitu o de anzone.

Po cumprobare s'ispressidura de su cazu, si poniat unu pagu de late in sa pranta de sa manu e cando cazaiat cheriat nàrrere ca su tantu de cazu postu fuat zustu.

Una manera diferente fuat a si regulare in sa cantidad de cazu faddia s'àtera borta (die in antis), duncas si provaiat atzunghendende unu àteru tantu.

A pustis cazau( passaos 20 minutos), si su late fuat frimu si morigaiat, si invetzes fuat ancora modde si ispetait a ddu morigare.

Una borta cazau si morigaiat e si betaiat a sas cannadas de linna . Su pischeddu de casu ddu inzotaiant e ddu poniant in sa murza (po 24 oras de tempus si serbiat po sa famìllia, invetzes 48 oras si serbiat po bèndere).

Bogau de sa murza si poniat a sicare.

Po provare sa murza si betaiat un' ou e si custu abbaraiat in pitzu cheriat nàrrere ca andaiat bene. Ònnia 20 dies sa murza si cambiaiat. Ma si su casu si samunaiat bene in antis de ddu pònnere in sa murza, issa duraiat de prus.

Su labiolu una borta bogau su casu si torraiat a callentare po fàere su soru.

Po su soru chi si saliat si fuat po ddu papare luego si betaiat a sa cannada, si nono si lassaiat sicare o in unu pannigheddu o in unu cuneddu.

In tempus antiqu, cando s'inari fut pagu, su soru s'iscambiaiat in Ardaule cun ozu 'ermanu.

Sa jota invetzes, chi fuat su chi abbaraiat dae su late a pustis bogau su soru e su casu, serbiat o po zare a papare a sos procos o po fàere s'istrezu.

A pustis, su casu si afumaiat; calincunu po tìnghere su corzu de su casu ddi poniat s'abba de sa mata de crecu o de suerzu chi fuat a tuva.

Ddi poniant fintzas estratu de cafè po ddu fàere prus iscuru.

A pustis po ddu sicare ddu poniant in **sas cannitzadas** (podiant èssere de canna o de tàula); in su cuile ddu fuant **sos cannitzos** (cun prus cannitzadas)

Sa tzimucca de casu cando fuat prontu a papare podiat èssere, cando bessiat, casu martzu. Medas bortas custu capitaiat cando fuat ambu o si fuat fatu in tempus de callente.

## **A papare**

**Macarrones de purde:** si pigaiat sa pasta de su casu ìschidu(acido) e si poniat a cundire sa pasta.

**Culurzones**

**Orrubiolos**

**Sabadas**

**Cazau**

**Cazau de murza**

**Pane cun casu**

**Pane cun soru**

*(Iscritu cun s'azudu de tzia Burica Mascia e tziu Fineddu Loi)*